



Servir e chantar il medem mument, quai è stada la gronda show dals commembers dal Chor viril Breil.

FOTOS G. N. STGIER

Nov president per ils veterans

Uniun chantunala da veterans da chant

DA GION NUTEGN STGIER / ANR

■ **En il center da la dieta da l'uniun a Breil èn stadas las elecziuns da suprastanza. Successur da Luregn Carigiet sco president è Gion Darms. L'uniun ha er dus novs suprastants e cun Roland Capeder er in nov dirigent. En in onn s'inscuntran ils veterans da chant a Savognin.** En sia regiun pli stretga ha Luregn Carigiet, Dardin, il president actual da l'Uniun chantunala da veterans da chant, manà sia davosa radunanza. Per il cumià dal Sursilvan sco president da l'uniun èn veterans e veterans da chant vegnids gudent a Breil. Dad ina vart in segn da reconuschientscha e da l'autra vart in engraziament a Luregn Carigiet ch'è stà ils davos 15 onns in president cun in scharm particular, in um plain umor e cunzunt in parsura che ha contribuì fig bier ch'il dumber dals commembers da l'uniun è s'augmentà ferm ils davos onns. Da preschent ha l'uniun ch'è vegnida fundada il 1985 cun 985 commembers in bel dumber. L'incumbenza da l'uniun è er anc suenter 27 onns da tgirar ils lioms tranter ils chors e l'amicizia tranter las chantaduras ed ils chantadurs che chantan dapi 25 onns e dapli en in chor. Er dumengia passada tar la dieta annuala a Breil è quai stà il cas nua che tuts han giudi la buna cumpagnia. Contribuì bier a la buna cumpagnia han betg il davos ils 30 chantadurs dal Chor viril Breil cun lur dirigenta Inge Venzin cun dar cun diversas chanzuns la dretga noda a la 27. dieta da l'Uniun

chantunala da veterans da chant. Ultra da quai han dunnas ed umens da Breil organisà l'occurrenza bunamain en moda perfetga.

«Restai fidaivels als chors»

En ses davos rapport annual ha il president partent Luregn Carigiet be chattà bun peds per las veteranas ed ils veterans da chant. El ha ditg che senza las dunnas ed ils umens pli sin ils onns fissian ils chors bunamain inexistent. Luregn Carigiet ha er supplitgà ils preschents da restar en l'avegnir fidaivels als chors. Chant saja dapli che be chantar, ha el er anc ditg. Quai haja er confermà la Festa chantunala da chant a Trun dal zercladur passà che saja stada in grond success. En quels 15 onns sco president haja el giblers e cunzunt empernaivels inscunter cun chantaduras e chantadurs da tut las regiuns dal Grischun, ha ditg Luregn Carigiet. Per ses davos rapport annual ha el lura retschet in ferm e cordial applaus dals bunamain 180 veterans e veteranas da chant. Er quest onn ha l'uniun sustegnì finanziailmain la promoziun dals giuvenils da chant e quai cun ina summa da 2000 francs.

Otmar Netzer e Babina Bonorand da nov en suprastanza

Sco successur da Luregn Carigiet e sco nov president da l'Uniun chantunala da veterans da chant han ils preschents elegi Gion Darms. Dapi il 2003 appartegna il chantadur dal Chor viril Domat a la suprastanza da l'uniun e fin dumengia pas-

sada è el stà vicepresident dals veterans e da las veteranas da chant da noss chantun. Anne-Rose Ragetti, Schiers/Aschera, è stada dapi il 2001 actua da l'uniun e cun avair problems da sanadad è la dunna sa retratga da quel uffizi. Da nov en suprastanza èn vegnids elegids Otmar Netzer, Savognin e Babina Bonorand, Razén. Reelegì è lura vegnì Guido Ratti, Samedan sco cassier da l'uniun. Michael Cavigelli, Rueun, è ils davos nov onns stà dirigent dals veterans e da las veteranas e quella lavur surpiglia da nov Roland Capeder, Salouf. Da preschent è il Surmiran president dal Distric da chant Alvra, dapi 20 onns dirigent dal Chor viril Salouf, chantadur dal Chor viril Surses e commember da la furmazion «Cantori» da l'Origen Festival Cultural.

Sis novs veterans d'onur

In punct culminant da la dieta è lura adina l'onurificaziun dals novs veterans d'onur. A Breil èn sis chantadurs vegnids undrads per lur commembranza da 50 onns e dapli en in chor. Quai èn Pius Albrecht, Chor mischedau Dardin, Leo Jägli, Chor viril Tavau, Moritz Riedi, Chor viril Concordia Panaduz, Matheias Schaniel, Chor cecilian Tinizong, Oriano Sciamanna ed Annay Jehli, Chor cecilian Cazas. Ils davos 12 mais han ils zains tutgà per trais commembras e per 14 commembers ch'appartegnevan a l'Uniun chantunala da veterans da chant. Da quels eran schizunt set veterans d'onur e dals total 17 ch'èn betg pli tranter nus han gist 14 chantà en in chor rumantsch.



Il dirigent partent Michael Cavigelli (san.) cun ses successur Roland Capeder.



Dus veterans da Danis: Gregori Nay e Pauli Giger (da san.).



Chantan cun plaschair: Albert Cabernard, il president dal Chor viril Breil, ed Inge Venzin, la dirigenta.



Da Surmeir a la dieta a Breil èn vegnids quels trais veterans: Armando Wasescha, Gisep Demarmels e Peder Collet (da san.).



Quatter dals sis novs veterans d'onur: Rist Murezi Riedi, Leo Jägli, Pius Albrecht e Matheias Schaniel (da san.).



Yvonne Candinas e Mario Spescha, veterans dal Chor da la baselgia dal Salvador, Cuira.